

gustav / February 08, 2013 09:54PM

[金光明最勝王經唐龍興三藏教序](#)

唐龍興三藏教序

唐中宗皇帝制

蓋聞。蒼蒼者天列星辰而著象。茫茫者地奠川岳以成形。仰觀天文既如彼也。俯循地理又若斯焉。夫以妙旨幽微。名言之路攸絕。真如湛寂性相之義都捐然。則發啟心聲。資法雷之激響。獎導迷眾俟覺首以司方。故知假名不壞。於常名樂說。乃詮於無說至若象外之象。猶稱三界之尊天中之天。爰著六通之聖法王見利孕育於七十二君。梵帝乘時牢籠於萬八千歲。周星闕彩言符降誕之徵。漢日流祥載葉通神之籙。故能威揚沙劫化被塵區。玉毫舒耀而除昏。金口弘宣而遣滯。破煩惱之賊詎。藉干戈壞生死之軍。惟憑慧力瘳圓明之界。廣納於無邊。開常樂之門。普該於有識。縱使浮天欲浪境風息而俄澄。漲日情塵法雨霑而便廓。歸依者銷殃而致福。回向者去危而獲安。可謂巍巍乎。其有成功蕩蕩乎。而無能名者矣。但四生蠢蠢未悟。無常六趣悠悠俱纏有結。詎知空華不實。水月非堅。馳逐於五陰之中。播遷於三界之域。納諸品匯終俟法門。自白馬西來。玄言東被世尊。則隨類敷演眾生。乃逐性開迷。馬鳴擅美於瓊編。龍樹勝芳於寶偈。於是遙通震旦。遠布閩浮。半滿之教區分大小之乘。并驚澄安后德。接武於勝場。琳遠高人駢蹤法宇。遂使微言著范。歷千古而揚英聲。至(丿+目+責)流規。周十方而騰茂實。頃屬后周應運。大扇魔風遂使天下招提。咸從毀廢。寰中法侶并混編毗。嗟乎。闕寂禪居。空留宴坐之處。荒涼慧苑。無復經行之蹤。爰泊開皇。重將修建。旋逢大業。又遇分崩。鬼哭神吟。山鳴海沸。既遭涂炭。寧有伽藍。正法消淪。邪見增長。於是人迷覺路。遭迴於苦集之區。俗蔽真宗。羈絆於蓋纏之內。

我大唐之有天下也。上凌巢燧。俯視羲軒。三聖重光。萬邦一統。威加有截。澤被無垠。掩坤絡以還淳。互乾維而獻款。再懸佛日。重補梵天。龍宮將八柱齊安。鷲嶺共五峰爭峻。大弘釋教。諒屬皇朝者焉。大福先寺翻經三藏法師義淨者。范陽人也。俗姓張氏。五代相韓之后。三臺仕晉之前。朱紫分輝。貂蟬合彩。高祖為東齊郡守。仁風逐扇。甘雨隨車。化闡六條。政行十部。爰祖及父。俱厭俗榮。放曠一丘。逍遙三徑。含和體素。養性恬神。摘芝秀於東山。挹清流於南澗。可謂尋幽丹嶠棲偃白云泉鶴。於是吞聲場駒以之執影。法師幼挺明晤。夙彰聰敏。才俞辯李之歲。心樂出家。甫過游洛之年。志尋西國。業該經史。學洞古今。聰三藏之玄樞。明一乘之奧義。既而閑居習靜。息慮安禪。托彼山林。遠茲塵累。三十有七。方遂雅懷。以咸亨二年。行至廣府。發蹤結契數十人。鼓棹升航。唯存一已。巡南溟以遐逝。指西域以長驅。歷巖岫之千重。凌波濤之萬里。漸屆天竺。次至王城。佛說法華靈峰尚在。如來成道聖躅仍留。吠舍城中。獻蓋之足跡不泯。給孤園內布金之地猶存。三道寶陞居然目睹。八大靈塔邈矣親觀。所經三十餘國。凡歷二十餘載。菩提樹下屢攀折以淹留。阿耨池邊幾濯纓而澡。鑑法師慈悲作室。忍辱為衣。長齋則一食自資。長坐則六時無倦。又古來翻譯之者。莫不先出梵文。后資漢譯。摭詞方憑於學者。詮義別稟於僧徒。今茲法師不如是矣。既閑五天竺語。又詳二諦幽宗。譯義綴文咸由於已出。指詞定理匪假於旁求。超漢代之摩騰。跨秦年之羅什。所將梵本經共四百部。合五十萬頌。金剛座真容一鋪。舍利三百粒以證聖。元年夏五月方屆都焉。則天大圣皇帝。出震膺期。乘乾握紀。紹隆為務。弘濟為心。爰命百寮兼整四眾。虹幡輝日。鳳吹遏云。香散六銖。華飄五色。鏘鏘濟濟。煒煒煌煌。迎于上東之門。置于授記之寺。共于闡三藏及大福先寺寺主沙門。復禮西崇福寺主法藏等。翻華嚴經后。至大福先寺。與天竺三藏實思末多。及授記寺主慧表沙門勝莊慈訓等。譯根本部律。其大德等。莫不四禪凝虛。六度冥懷。懸法鏡於心臺。朗戒珠於性海。詞林挺秀。將覺樹而聯芳。慧炬揚輝。澄桂輪而合影。渾金璞玉。諒屬其人。誠梵宇之棟梁。實法門之龍象。已翻諸雜經律二百餘卷。繕寫云畢。尋并進內其餘戒律諸論。方俟后詮五篇之教。具明八法之因。備曉鵝珠。尚護蟲命無傷。浮囊必取於不虧。油鉢終期於靡覆。崇聖教之綱紀。啟含生之耳目。伏愿上資先聖。長隆七廟之基。下逮微躬。恒佐九天之命。遷懷生於壽域。致薄俗於淳源。歲稔時和。遠安邇肅。願以萬機務總四海事。殷爰憑乙夜之餘式。贊彌天之德。課虛扣寂。聊題序云。

Edited 1 time(s). Last edit at 02/08/2013 10:09PM by gustav.

---